

中國文學研究典籍叢刊

〔明〕高 棟 編纂 汪宗尼 校訂 葛景春 胡永傑 點校

唐詩品彙

五

中華書局

中國文學研究典籍叢刊

唐詩品彙

五

〔明〕高 棟 編纂 汪宗尼 校訂
葛景春 胡永傑 點校

中華書局

五言律詩卷之五

正宗（上）

李白

宮中行樂詞六首

水綠南薰殿，花紅北闕樓。鶯歌聞太液，鳳吹繞瀛州。
素女鳴珠珮，天人弄綵毬。今朝
風日好，宜人未央遊。

其二

寒雪梅中盡，春風柳上歸。
宮鶯嬌欲醉，簷燕語還飛。
遲日明歌席，新花豔舞衣。
晚來移彩杖，行樂泥光輝。

其三

繡戶香風暖，紗牕曙色新。
宮花爭笑日，池草暗生春。
綠樹聞歌鳥，青樓見舞人。
昭陽桃李月，羅綺自相親。

其四

盧橘爲秦樹，蒲萄出漢宮。
煙花宜落日，絲管醉春風。
笛奏龍吟水，簫鳴鳳下空。
君王多樂事，還與萬方同。

其五

柳色黃金嫩，梨花白雪香。
玉樓巢翡翠，金殿鎖鴛鴦。
選妓隨雕輦，徵歌出洞房。
宮中誰第一，飛燕在昭陽。

其六

小小生金屋，盈盈在紫微。
山花插寶髻，石竹繡羅衣。
每出深宮裏，常隨步輦歸。
只愁歌舞散，化作綵雲飛。

塞下曲三首

五月天山雪，無花只有寒。
笛中聞折柳，春色未曾看。
曉戰隨金鼓，宵眠抱玉鞍。
願將腰下劍，直爲斬樓蘭。

其二

駿馬似風颺，鳴鞭出渭橋。
彎弓辭漢月，插羽破天驕。
陣解星芒盡，營空海霧消。
功成畫麟閣，獨有霍嫖姚。

其三

塞虜乘秋下，天兵出漢家。
將軍分虎竹，戰士卧龍沙。
邊月隨弓影，胡霜拂劍花。
玉關殊未入，少婦莫長嗟。

秋思

燕支黃葉落，妾望自登臺。
海上碧雲斷，單于秋色來。
胡兵沙塞合，漢使玉關回。
征客無歸日，空悲蕙草摧。

金陵二首

六代興亡國，三杯爲爾歌。苑方秦地少，山似洛陽多。古殿吳花草，深宮晉綺羅。併隨人事滅，東逝與滄波。

其二

地擁金陵勢，城迴江水流。當時百萬戶，夾道起朱樓。亡國生春草，王（今按，《全唐詩》作「離」）宮沒古丘。空餘後湖月，波上對江州。

溫泉侍從歸逢故人

漢帝長楊苑，誇胡羽獵歸。子雲叨侍從，獻賦有光輝。激賞搖天筆，承恩賜御衣。逢君奏明主，他日共翻飛。

侍從遊宿溫泉宮作

羽林十二將，羅列應星文。霜仗懸秋月，霓旌卷夜雲。嚴更千戶肅，清樂九天聞。日出瞻佳氣，蔥蔥繞聖君。

口號贈徵君盧鴻（公時被召。）

陶令辭彭澤，梁鴻入會稽。我尋高士傳，君與古人齊。雲卧留丹壑，天書降紫泥。不知楊伯起，早晚向關西。（范云：律詩必須守規矩，試看此等五言，何其嚴哉。今人虛實輕重且不審，惡乎律？）

贈崔秋浦

吾愛崔秋浦，宛然陶令風。門前五楊柳，井上二梧桐。山鳥下聽（今按，據姚本，《全唐詩》卷一

六九作「廳」，四庫本、詹鏐本《李白全集》卷九作「聽」事，簷花落酒中。懷君未忍去，惆悵意無窮。

贈錢徵君少陽

白玉一杯酒，綠楊三月時。
春風餘幾日，兩鬢各成絲。
秉燭唯須飲，投竿也未遲。
如逢渭川獵，猶可帝王師。

贈孟浩然

吾愛孟夫子，風流天下聞。
紅顏棄軒冕，白首卧松雲。
醉月頻中聖，迷花不事君。
高山安可仰，徒此揖清芬。

寄淮南友人

紅顏悲舊國，青歲歇芳洲。
不待金門詔，空持寶劍遊。
海雲迷驛道，江月隱鄉樓。
復作

淮南客，因逢桂樹留。

三山望金陵寄殷淑

三山懷謝朓，水澹望長安。
蕪沒河陽縣，秋江正北看。
盧龍霜氣冷，鳩鵲月光寒。
耿耿憶瓊樹，天涯寄一歡。

寄王漢陽

南湖秋月白，王宰夜相邀。
錦帳郎官醉，羅衣舞女嬌。
笛聲喧沔鄂，歌曲上雲霄。
別後空愁我，相思一水遙。

望漢陽柳色寄王宰

漢陽江上柳，望客引東枝。
樹樹花如雪，紛紛亂若絲。
春風傳我意，草木別前知。
寄謝

絃歌宰，西來定未遲。

留別龔處士

龔子棲閑地，都無人世喧。
柳深陶令宅，竹暗辟疆園。
我去黃牛峽，遙愁白帝猿。
贈君卷施草，心斷竟何言。

廣陵贈別

玉瓶沽美酒，數里送君還。
繫馬垂楊下，銜杯大道間。
天邊看綠水，海上見青山。
興罷各分袂，何須別醉。
（今按：《全唐詩》卷一七四，詹鏐本《李白全集》作「醉別」）顏。

別儲邕之剡中

借問剡中道，東南指越鄉。
舟從廣陵去，水入會稽長。
竹色溪下綠，荷花境
（今按：《全唐詩》

作「鏡」裏香。辭君向天姥，拂石卧秋霜。

江夏別宋之悌

楚水清若空，遙將碧海通。人分千里外，興在一杯中。
谷鳥迎晴日，江猿嘯晚風。平生不下淚，於此泣無窮。

渡荆門送別

渡遠荆門外，來從楚國遊。山隨平野盡，江入大荒流。
月下飛天鏡，雲生結海樓。仍憐故鄉水，萬里送行舟。

南陽送客

斗酒勿爲薄，寸心貴不忘。坐惜故人去，偏令遊子傷。
離顏怨芳草，春思結垂楊。揮手

再三別，臨岐空斷腸。

送白利從金吾董將軍西征

西羌延國討，白起佐軍威。
劍決浮雲氣，弓彎明月輝。
馬行邊草綠，旌卷曙霜飛。
抗手相顧，寒風生鐵衣。

送殷淑

白鷺洲前月，天明送客迴。
青龍山後日，早出海雲來。
流水無情去，征帆逐吹開。
相看不可別，更進手中杯。

送友人

青山橫北郭，白水繞東城。
此地一爲別，孤蓬萬里征。
浮雲遊子意，落日故人情。
揮手

自茲去，蕭蕭班馬鳴。

送友人入蜀

見說蠶叢路，崎嶇不易行。
山從人面起，雲傍馬頭生。
芳樹籠秦棧，春流繞蜀城。
升沉應已定，不必問君平。

送麴十少府

試發清秋興，因爲吳會吟。
碧雲斂海色，流水折江心。
我有延陵劍，君無陸賈金。
艱難此爲別，惆悵一何深。

尋雍尊師隱居

羣峭碧摩天，逍遙不記年。
撥雲尋古道，倚樹聽流泉。
花暖青牛卧，松高白鶴眠。
語來

江色暮，獨自下寒煙。

訪戴天山道士不遇

犬吠水聲中，桃花帶雨濃。
樹深時見鹿，溪午不聞鐘。
野竹分青靄，飛泉掛碧峯。
無人知所去，愁倚兩三松。

流夜郎至江夏陪長史叔及薛明府宴興德寺南閣

紺殿橫江上，青山落鏡中。
岸迴沙不盡，日映水成空。
天樂流香閣，蓮舟颺晚風。
恭陪竹林宴，留醉與陶公。

與夏十二登岳陽樓

樓觀岳陽盡，川迴洞庭開。
鴈引愁心去，山銜好月來。
雲間連下榻，天上接行杯。
醉後

涼風起，吹人舞袖迴。（劉須溪云：甚爲不俗。）

過崔八丈水亭

高閣橫秀氣，清幽併在君。簷飛宛溪水，牕落敬亭雲。猿嘯風中斷，漁歌月裏聞。閑隨白鷗去，沙上自爲羣。

秋登宣城謝朓北樓

江城如畫裏，山曉望晴空。兩水夾明鏡，雙橋落彩虹。人煙寒橘柚，秋色老梧桐。誰念北樓上，臨風懷謝公。

謝公亭

（蓋謝朓、范雲之所遊。）

謝公離別處，風景每生愁。客散青天月，山空碧水流。池花春映日，牕竹夜鳴秋。今古

一相接，長歌懷舊遊。

太原早秋

歲落衆芳歇，時當大火流。
霜威出塞早，雲色渡河秋。
夢繞邊城月，心飛故國樓。
思歸若汾水，無日不悠悠。

觀獵

太守耀清威，乘閑弄晚暉。
江沙橫獵騎，山火繞行圍。
箭逐雲鴻落，鷹隨月兔飛。
不知白日暮，歡賞夜方歸。

觀胡人吹笛

胡人吹玉笛，一半是秦聲。
十月吳山曉，梅花落敬亭。
愁聞出塞曲，淚滿逐臣纓。
卻望